

家 訓

家訓者為吾先人所垂訓於子孫也其意在使子孫首先明瞭本身之基本工作皆日常踐行之事無深閎奧衍難通之義自修身齊家至於治國平天下捨此不足以為人茲特略申其義著於譜并榜於廟今之人後之人其鑒於此

敬祖先

宗廟者先人靈爽所憑也墳墓者先人遺骸所藏也飲水思源理宜尊敬有祖先然後有父母有父母即應敬祖先奉先思孝子孫之心春露秋霜歲時陳祀庶幾根本無虧不忘所自記云入廟思敬過墟思哀願為子孫者常敬體之

孝父母

父母之恩昊天罔極人皆知之為人子者承事應如何盡歡奉養應如何盡禮庶可藉報劬勞於萬一先賢云樹欲靜而風不寧子欲養而親不在與其椎牛而祭墓不如雞豚之逮存知此則知所以養父母矣

友兄弟

兄弟猶手足也手足之情出於天性絲毫不可假借詩云兄弟鬩

於牆外禦其侮其至情於此可見矣豈可不友乎古人云世間最難得者兄弟易得者田地願為兄弟者三復斯言

睦宗族

宗族既出一源自無親疏之別張橫西銘訂頑說云民吾同胞物吾與也一視同仁而况於族乎故一族之間必敦雍睦豈可視若秦越而不相愛相親互相扶助以傷厥祖之心也陶靖節詩云同源派人易世疏慨然寤歡念茲厥初體此則宗族自睦

勤國事

人民之於國家有納稅服役之義務凡政府所頒法令及關係地方治安等事宜自應奉之維謹不得懈怠須知有國然後有家國破則家亡此一定之理願吾族人其深思之

擇交游

索居不能寡過攻錯於以有成友固人所宜有然締交之初必須選擇倘或濫交損友小則傾家蕩產大則速禍亡身可不慎歟白居易詩云乃知擇交難須有知人明之句願族之交友者有以凜之

務本業

士農工商各居一業如能專心本業研究不懈其業未有不成諺云天下無難事只怕有心人語雖粗淺具有至理倘或見異思遷朝更

夕改未見其有濟也韓愈公進學解有云業精於勤荒於嬉願族中子弟咸深味之

嚴庭訓

遺金滿贏不如遺子一經經訓法也然借古人之法以訓之尤必以家法維古法維者何嚴是也父兄之教不先子弟之率不謹若庭訓不嚴任其放縱則他日子弟之不肖其過究誰任耶傳曰愛子教以義方勿納於邪尚其念哉

端閨化

閨門為萬化之原持之必謹古人對於男女授受之間亦必不親也近世歐風東漸社交公開男女相從恬不為耻為家長對此應嚴為約束以免吾國禮教之邦而為夷狄所變斯幸甚矣古人云閨門之內肅若朝廷良有以也

息爭訟

訟之由興皆由於自己不肯讓步族人不肯言公如果自肯讓步縱對方如何恃強壓迫逆來順受甘心容忍其事必然冰釋族人遇有此事如能秉公持正毋左袒毋模凌毋顛倒是則功非則叱其訟自息矣古人云好訟之人其家必破良可慨也